



PREVENCIÓN E CONTROL DA INFECCIÓN POLO VIRUS SARS-CoV-2 NAS EXPLOTACIÓNS AGRÍCOLAS CON TRABALLADORES TEMPOREIROS

Dirección Xeral de Saúde Pública

Santiago de Compostela, 6 de setembro de 2021





Este documento estará en permanente revisión e actualización e dispoñible na páxina web corporativa do Servizo Galego de Saúde en: <https://coronavirus.sergas.es/>

Versión 1: 18/08/2020

Versión 2: 06/09/2021



1. Introducción

A pandemia provocada polo coronavirus SARS-CoV-2 continúa a ser o maior desafío para a saúde do último século.

A evolución da situación epidemiolóxica e sanitaria provocadas pola COVID-19, fixeron necesaria a adopción de medidas excepcionais de prevención e control da propagación do virus (limitación de mobilidade, peche dos establecementos de hostalaría, etc) que conseguiron diminuír a incidencia da infección.

Na actualidade, atopámonos nun novo escenario, no cal dispoñemos de vacinas contra a COVID-19 que, segundo a evidencia actual, son eficaces para reducir a infección sintomática e asintomática, a enfermidade leve, moderada e grave, e a mortalidade.

Non obstante, é coñecido que a inmunidade xerada polas vacinas non impide de maneira completa a replicación do virus na mucosa das vías respiratorias superiores da persoa vacinada e ademais, a resposta inmune é menor en diversos grupos poboacionais e pode verse afectada pola aparición de novas variantes.

Debido a todo o anterior, é necesario que se sigan adoptando por parte das autoridades sanitarias as medidas orientadas á prevención da transmisión da COVID-19 e á detección precoz dos casos e os seus contactos estreitos.

Isto é de especial importancia no ámbito das campañas agrícolas que precisan da contratación de traballadores temporeiros que se desprazan de diferentes zonas xeográficas e que, nalgúns casos, requiren aloxamentos compartidos nos territorios nos que se desenvolve a campaña agraria.

Por este motivo, é necesario maximizar a seguridade sanitaria nestas campañas coa finalidade de conxugar a continuidade da actividade coa saúde dos traballadores do campo e os seus empregadores.



2. Obxectivo

O obxectivo do documento é servir de guía para o establecemento das medidas necesarias para a prevención e control da infección polo SARS-CoV-2 nas empresas que realizan campañas agrícolas con traballadores temporeiros na Comunidade Autónoma de Galicia.

3. Clasificación e definición dos casos

- **Caso sospeitoso:** calquera persoa cun cadro clínico de infección respiratoria aguda de aparición súbita de calquera gravidade que cursa, entre outros, con febre, tose ou sensación de falta de aire. Outros síntomas como a odinofaxia, anosmia, axeusia, dor muscular, diarrea, dor torácica ou cefalea, entre outros, poden ser considerados tamén síntomas de sospeita de infección segundo criterio clínico.

A todos os casos sospeitosos indicaráselles illamento e solicitarase unha proba diagnóstica para confirmar a sospeita.

As persoas vacinadas que presenten sintomatoloxía compatible con infección polo SARS-CoV-2 serán tamén consideradas caso sospeitoso e manexaranse como tal.

As persoas sintomáticas que tiveran unha infección polo SARS-CoV-2 confirmada cunha proba diagnóstica de infección aguda (PDIA: proba rápida de detección de antíxenos ou RT-PCR) nos 90 días anteriores, non serán consideradas casos sospeitosos de novo.

- **Caso probable:** persoa con infección respiratoria aguda grave con criterio clínico e radiolóxico compatible con COVID-19 e con resultados de PDIA negativos, ou casos sospeitosos de infección polo SARS-CoV-2 con PDIA non concluínte.



Os casos probables manexaranse como os casos confirmados.

- **Caso confirmado con infección activa:**
 - Persoa que cumpre criterio clínico de caso sospeitoso e PDIA positiva.
 - Persoa asintomática con PDIA positiva. En situacións de cribado, so se considerará caso confirmado si se obtén unha PCR positiva.
- **Caso descartado:** caso sospeitoso con PDIA negativa e no que non hai alta sospeita clínico-epidemiolóxica.

3. Liñas de actuación

Neste documento descríbense as liñas de actuación no tocante á vixilancia, prevención e control da infección polo SARS-CoV-2 nas explotacións agrícolas nas que se realiza a contratación de traballadores temporeiros.

3.1. Vixilancia da infección polo SARS-CoV-2

Para evitar a aparición de novos abrochos da infección polo SARS-CoV-2 é necesaria un labor de vixilancia e monitorización continuas, tanto para a detección precoz de novos casos de COVID-19 e dos seus contactos, como para o seguimento dos mesmos.

Ademais, ao tratarse nalgúns casos de traballadores que se desprazan dende unhas campañas agrícolas a outras, recoméndase que a empresa contratante obteña información acerca das empresas nas que os traballadores puideran exercer o seu labor previamente. Desta maneira facilitaríase a organización dos traballadores para a formación de equipos de traballo e a súa posible ubicación en vivendas.



3.1.1. Detección precoz de casos de infección polo SARS-CoV-2

Segundo o Ministerio de Sanidade, no momento actual non se aconsella a realización de PCR a persoas asintomáticas fóra de determinadas estratexias de cribado: ante novos ingresos en centros sanitarios ou de forma previa a algunhas actuacións asistenciais e en estratexias indicadas polas autoridades de saúde pública dirixidas a determinados grupos ou poboacións. Neste sentido, realizaranse probas de detección de infección polo virus SARS-CoV-2 nos traballadores no inicio da campaña agrícola. Así mesmo, poderanse plantexar estratexias de cribado nas explotacións agrícolas con traballadores temporeiros ante a aparición de brotes. Ademais considerarase a realización de cribado aos traballadores que proveñan de zonas catalogadas de alto risco pola Consellería de Sanidade segundo o disposto na *ORDE do 27 de xullo de 2020 pola que se establecen medidas de prevención para facer fronte á crise sanitaria ocasionada polo COVID-19 en relación coa chegada á Comunidade Autónoma de Galicia de persoas procedentes doutros territorios*.

En consonancia co que se recolle nesa orde, as persoas que cheguen á Galicia despois de ter estado, dentro do período dos catorce días naturais anteriores á dita chegada, en territorios cunha alta incidencia do COVID-19 (en comparación coa existente na Comunidade Autónoma galega) ou respecto dos cales non se dispoña de información sobre a situación epidemiolóxica existente neles deberán comunicar, nun prazo máximo de 24 horas desde a súa chegada os datos de contacto e de estadía en Galicia. Para tal fin, deberán cubrir o formulario dispoñible no enderezo <https://coronavirus.sergas.gal/viaxeiros/> ou ben subministrar os datos chamando ao teléfono 881 00 20 21.

A listaxe de territorios que se consideran de alta incidencia poden consultarse no enderezo <https://www.sergas.es/Saude-publica/benvida-viaxeirxs>



O procedemento a seguir para o cribado será o seguinte:

- A empresa deberá elaborar unha listaxe na que consten os seguintes datos dos traballadores contratados: nome e apelidos, data de nacemento, teléfono de contacto, número do documento nacional de identidade (D.N.I.) ou número de identidade de estranxeiro (N.I.E.) e o número da Seguridade Social.
- Esta listaxe será remitida, a través do correo electrónico, á dirección da área sanitaria na que se ubica a empresa (arquivo encriptado).
- A área sanitaria correspondente organizará a realización do cribado (citación, datas e lugar de realización) da maneira que mellor conveña a ambas partes.
- A empresa será a responsable de transmitir toda a información acerca da organización do cribado aos traballadores.
- Os resultados positivos serán comunicados aos traballadores polos seus médicos de familia ou polo servizo de Medicina Preventiva que informarán, das medidas a seguir (illamento domiciliario).
- Os resultados negativos notificaranse aos traballadores a través dun SMS. De non ser posible, seguirase a canle de comunicación anterior.
- O seguimento dos casos confirmados con infección activa será realizado por un médico de familia. A identificación e seguimento dos seus contactos estreitos realizarase pola Central de Seguimento e a Xefatura Territorial de Sanidade correspondente segundo o protocolo establecido.



- En ningún caso, permitirase que un traballador acuda ao seu posto de traballo se presenta un resultado compatible con infección activa polo SARS-CoV-2.

3.1.2. Vixilancia activa da aparición de casos de COVID-19

De maneira adicional á realización das probas de detección de infección polo SARS-CoV-2, ao longo da campaña agrícola e previo ao inicio da actividade laboral, o traballador realizará un autocontrol de síntomas relacionados coa COVID-19¹. En caso de aparición dalgún deles o traballador deberá illarse e chamar ao centro de saúde ou ao 900 400 116 ou, no caso de non residir en Galicia e non ter médico de familia asignado, o 881 00 20 21.

3.2. Prevención da infección polo SARS-CoV-2

A estratexia desta liña de actuación baséase na aplicación de medidas dirixidas a protexer aos traballadores, reducindo a probabilidade de contaxio da infección polo SARS-CoV-2.

Con tal fin, e sobre a base da realización da avaliación do risco, elaboraranse por parte das empresas responsables, plans de continxencia que deberán detallar as medidas concretas que se van a adoptar para diminuír os riscos de contaxio da COVID-19 (organización de equipos de traballo, de residencia e de transporte estables, establecemento de circuitos de entrada e saída das instalacións, proporcionar información e formación dos traballadores, subministrar equipos de protección individual, etc.) e o protocolo de actuación en caso de detección de traballadores infectados ou que estiveran en contacto cun caso confirmado de COVID-19.

1 Os síntomas máis comúns da Covid-19 son: febre, tose e dificultade respiratoria. Outros síntomas poden incluír: cansazo, dores musculares, dor de garganta, dor de cabeza, diarrea, vómitos. Algunhas persoas perden o sentido do olfacto ou do gusto.



Durante a elaboración do plan de continxencia é importante a coordinación cos responsables dos aloxamentos comúns (residencias temporais, hostais, albergues, etc.), as administracións locais, empresas de contratación de traballo temporais, etc. co fin de establecer canles de intercambio de información que permitan a adopción rápida de medidas ante a aparición dun caso sospeitoso de COVID-19.

Os eixos principais da estratexia de prevención serían a vacinación, a información e formación dos traballadores, a aplicación de medidas de hixiene, e a adaptación da organización laboral á situación epidemiolóxica existente.

3.2.1. Vacinación

A inmunización da poboación a través da vacinación xeral, demostrou ser a medida máis eficaz para o control da pandemia de SARS-CoV-2.

O obxectivo da estratexia de vacinación é prevenir a COVID-19 e diminuír a súa gravidade e mortalidade da COVID-19.

A vacinación é dobremente importante xa que protexe directamente á persoa vacinada, pero tamén protexe de forma indirecta ao resto da poboación o que facilitará diminuír o impacto que a pandemia ocasiona no ámbito social, asistencial e económico.

Por todo o anterior, ofrecerase a vacinación a todos os traballadores que desexen vacinarse, ben sexa primovacinação como completar a pauta de vacinación unha vez transcorrido o intervalo establecido na ficha técnica da vacina administrada como primeira dose.

O procedemento a seguir para o cribado será o seguinte:

- A empresa deberá elaborar unha listaxe na que consten os seguintes datos dos traballadores contratados que desexen vacinarse: nome e



apelidos, data de nacemento, teléfono de contacto, número do documento nacional de identidade (D.N.I.) ou número de identidade de estranxeiro (N.I.E.) e o número da Seguridade Social.

- Indicarase de se trata de primovacinação ou de administración dunha segunda dose.
- No caso de que se trate dunha segunda dose, deberase indicar o nome da vacina administrada na primeira dose e a data e lugar da súa administración. Neste caso o traballador deberá presentar o documento que acredite esta circunstancia no momento de ser vacunado.
- Esta información será remitida nunha folla de cálculo ao correo electrónico da Dirección Xeral de Saúde Pública: saude publica@sergas.es
- A Dirección Xeral de Saúde Pública comprobará a información recibida e remitirá ás áreas sanitarias correspondentes a listaxe de persoas a vacinar.
- As áreas sanitarias xestionarán a cita e informarán do lugar e data da vacinación ao interesado.

3.2.2. Formación e información

Un dos pilares básicos da prevención da infección é a adecuada información e formación dos traballadores. Así, faise necesario garantir a comunicación adecuada e continua da información actualizada sobre as características da enfermidade (mecanismo de transmisión, sintomatoloxía, etc.), medidas de prevención da transmisión da infección polo SARS-CoV-2 e protocolos de actuación facendo fincapé no uso correcto das máscaras e na hixiene de mans e respiratoria.



Informarase das medidas de prevención da infección polo SARS-CoV-2 mediante o emprego de cartelería situada en lugares estratéxicos (entrada do lugar de traballo, lugares de tránsito, aseos, vestiarios, comedores, aloxamentos, etc.). Incidirase na importancia da hixiene de mans e respiratoria, uso de máscaras cirúrxicas/hixiénicas, así como no mantemento das medidas de distanciamento interpersoal.

Así mesmo, a empresa proporcionará ao traballador, xunto coas medidas de prevención e protección, unha relación de síntomas que debe vixiar así como o procedemento a seguir en caso de padecelos (chamar ao centro de saúde ou ao 900 400 116 ou, no caso de non residir en Galicia e non ter médico de familia asignado, o 881 00 20 21). En ningún caso permitirase que un traballador acuda ao seu posto de traballo de presentar calquera sintomatoloxía que puidera estar asociada coa infección polo SARS-CoV-2, ata a valoración clínica pertinente. Tampouco deberá acudir no caso de ser un contacto estreito dun caso confirmado salvo que a persoa cumpra alomenos un dos criterios de exención de corentena:

- Persoa que recibiu a pauta de vacinación completa.
- Persoa asintomática que tivo infección polo SARS-CoV-2 confirmada por PDIA nos 180 días anteriores ao contacto.

Nos dous casos anteriores so se establecerá corentena nas seguintes situacións:

- Contactos de casos vinculados a brotes producidos polas variantes Beta e Gamma.
- Persoas con inmunodepresión.

Toda a información, formación ou documentación de apoio realizarase e entregarse nun idioma comprensible para a persoa traballadora. Neste sentido, poderanse empregar, ademais dos materiais publicados polo Servizo



Galego de Saúde en castelán e galego, os publicados polo Ministerio de Sanidade en diferentes idiomas (ingés, árabe, francés, rumano).

3.2.3. Medidas de xerais hixiene

3.2.3.1. Medidas de hixiene persoal

Os traballadores deben coñecer o plan de continxencia elaborado e, de maneira específica, as súas responsabilidades no marco da xestión do risco.

Con respecto ás medidas de protección persoal, deberán manterse e reforzarse en todos os ámbitos de traballo as seguintes medidas de precaución:

- Os traballadores deben evitar o contacto físico e respectar a distancia de seguridade interpersoal de 1,5 metros sempre que sexa posible.
- Deberase seguir a normativa vixente en Galicia en canto ao emprego obrigatorio de máscara cirúrxica/hixiénica por parte de todo o persoal da empresa.
- O traballador realizará unha adecuada hixiene de mans: lavado frecuente (antes, durante e despois da xornada laboral) e meticuloso das mans con auga e xabón cando estean visiblemente suxas e despois de usar o inodoro. No resto de situacións poderanse empregar solucións/xeles hidroalcohólicos ou antisépticos con capacidade virucida.
- Por outra banda, para diminuír o risco de transmisión da infección polo SARS-CoV-2 por contacto indirecto, deberase evitar compartir obxectos de uso individual, alimentos, bebidas, etc.
- Hixiene respiratoria – Etiqueta respiratoria:



- Usar panos desbotables ao tusir ou esberrar e desbotalos nunha papeleira (preferentemente de accionamento non manual) tras o seu uso. De non dispoñer de panos desbotables, cubrir a boca e o nariz coa flexura do cóbado.
- Despois de tocar secrecións respiratorias (esberrar, tusir, uso de panos) e/ou obxectos que poideran estar contaminados, deberase realizar unha hixiene minuciosa das mans.
- Evitar tocar os ollos, o nariz e a boca para evitar a transmisión a través das mans.

3.2.3.2. Medidas de limpeza, desinfección e ventilación

As medidas mínimas de limpeza e desinfección que debe contemplar o plan de continxencia serían:

- Deberase planificar un reforzo de limpeza e desinfección dos locais, equipos e instalacións conforme ás características e intensidade do seu uso (alomenos unha vez ao día).
- As zonas de uso común (vestiarios, zonas de descanso, etc.), equipos e obxectos que se manipulen con frecuencia (pasamáns, interruptores, pomos de portas, etc.), equipos e ferramentas de traballo e zonas dos vehículos (agrícolas ou non) que podan ser utilizadas por máis dun traballador (volante, mandos, salpicadero, tiradores de apertura de portas, etc.) deberán desinfectarse con maior frecuencia á limpeza diaria.
- Os aseos deberán contar con dispensador de xabón e papel de secado (asegurando a reposición de consumibles en todo momento) e papeleira con apertura de accionamento non manual e dobre bolsa interior. En todo caso, evitanse as toallas non desbotables, incluso as de uso



individual. Os aseos limpiaranse e desinfectaranse alomenos 2 veces por xornada, aumentando a periodicidade de ser necesario.

- Todas as tarefas de limpeza e desinfección realizaranse sempre con máscara e luvas dun so uso e gafas de protección contra salpicaduras, de ser necesario. Antes e despois de realizada a limpeza, tras quitar as luvas e a máscara, o persoal de limpeza realizará unha completa hixiene de mans con auga e xabón.
- Os espazos pechados, incluídos os locais dos aloxamentos, deberán ventilarse de maneira natural (con aire exterior) varias veces ao día e sempre con anterioridade e ao finalizar o seu uso durante o máximo tempo posible (alomenos cinco minutos).
- Deberase asegurar unha correcta renovación do aire do local. De non ser posible unha correcta ventilación natural, deberanse axustar os sistemas de climatización/ventilación e extracción de aire para aumentar o número de renovacións por hora ou a porcentaxe de aire limpo exterior ($28\text{m}^3/\text{s}$), de forma que se evite no posible, a recirculación do aire interior (traballando coa máxima porcentaxe de aire limpo exterior que sexa posible).

Non se recomenda o emprego de ventiladores (de sobremesa, de aspas, etc.).

3.2.4. Medidas organizativas

En relación ás medidas organizativas deberanse manter ou establecer aquelas que diminúen o risco de infección polo SARS-CoV-2, adaptándoas ao escenario epidemiolóxico existente en cada momento.

As empresas deben establecer as accións necesarias para aprovisionarse dos recursos necesarios para garantir a protección individual dos traballadores e clientes (solucións/xeles hidroalcohólicos, mamparas de protección, máscaras,



pantallas faciais, luvas, etc.). Deberanse colocar xeles hidroalcohólicos en puntos estratéxicos e de doado acceso para os traballadores

Así mesmo, deberán planificar as tarefas e procesos de traballo de tal maneira que se garanta a distancia interpersoal de seguridade (1,5 metros) e se minimicen os contactos estreitos:

- Estableceranse circuítos diferenciados de entrada e saída e de circulación co fin de evitar o cruce de persoas. De ser posible, graduaranse os horarios de entrada e saída dos traballadores para evitar aglomeracións. En todo caso, manterase a distancia de seguridade interpersoal de 1,5 metros entre as persoas traballadoras.
- Nas zonas comúns (comedor, almacén, etc.) establecerase un aforo que permita o mantemento da distancia de seguridade.
- O traballo organizarase en equipos/grupos de traballadores que, na medida do posible, moveranse e desprazaranse sempre xuntos evitando o contacto con persoas doutros grupos. As actividades deberán planificarse de tal maneira que non se produzan encontros de distintos grupos de traballadores nos espazos e zonas comúns.
- No caso de existir quendas de traballo, estas organizaranse, de maneira que sempre se concentren os mesmos empregados nas mesmas quendas.
- A empresa deberá controlar e rexistrar os desprazamentos dos equipos de traballo durante a xornada laboral (explotación agraria, almacén, etc.).
- As pausas de descanso e comidas planificaranse en quendas correspondientes aos diferentes equipos de traballo co fin de evitar os contactos entre diferentes grupos. Na medida do posible, as pausas



realizaranse en espazos abertos ou, de ser o caso, cunha ventilación axeitada e mantendo a distancia de seguridade.

- Prohibiranse os sistemas de reparto de auga potable que conleven un uso compartido recomendándose o uso de botellas individuais que se podan reencher na explotación. Así mesmo non se permitirá compartir alimentos e bebidas e fumar se non se garda unha distancia de alomenos 2 metros.
- De existir un sistema de control de asistencia que requira un contacto coa persoa traballadora, garantirase a dispoñibilidade e o uso de xeles/solucións hidroalcohólicas ou desinfectantes con capacidade virucida antes e despois do seu uso.
- Evitarase o acceso de persoal alleo á empresa que non sexa esencial para o desenvolvemento da actividade. De ser imprescindible o acceso de dito persoal, levarase a cabo un censo do mesmo que será custodiado durante trinta días conforme a Lei Orgánica de Protección de Datos.
- Respecto do uso de vestiarios e aseos en todas as instalacións, poderase utilizar o 100% naqueles que dispoñan de cabinas, ou o 50% se non dispoñen delas.
- Procurarase o uso individual dos útis e equipos de traballo. De non ser posible, deberán desinfectarse antes e despois do seu uso.

No que respecta ao desprazamento dende e cara ao lugar de traballo, tanto se se trata de vehículos particulares dos traballadores como de transporte colectivo, deberanse ter en conta as seguintes recomendacións:

- Deberase planificar o transporte de tal maneira que os ocupantes pertencen ao mesmo equipo de traballo.



- Todos os ocupantes portarán máscara e realizarán hixiene de mans antes de entrar no vehículo.
- Ventilarase o vehículo antes, durante e despois do traxecto (apertura de portas ou ventás por exemplo). Non se deberá usar a función de recirculación do aire no interior.
- Realizarase unha limpeza e desinfección do interior do vehículo alomenos unha vez ao día, incidindo nos elementos de maior contacto (mandos, cintos de seguridade, dispositivos de apertura de portas, etc.) que poderían ser desinfectados despois de cada uso do vehículo.

En relación aos lugares de aloxamento proporcionados pola empresa ou entidades municipais, seguiranse as seguintes medidas:

- A organización das vivendas deberá realizarse dacordo aos grupos ou equipos de traballo establecidos.
- As empresas aseguraranse da dispoñibilidade de medios de prevención e protección apropiados fronte á COVID-19 nas residencias temporais postas a disposición dos traballadores. Como mínimo deberán contar con auga potable na red de subministro, conexión á red eléctrica e saneamento de augas residuais.
- Garantirase a provisión de auga, xabón, papel e solucións desinfectantes nos aseos e zonas comúns das residencias.
- Realizarase unha análise detallada das infraestruturas e características dos aloxamentos (número de andares, de habitacións, sistemas de acceso, zonas comúns, etc.) para a adopción de medidas, analizando a posibilidade de división destes en áreas ou sectores diferenciados para os residentes (que na medida do posible coincidiran cos grupos de traballo).



- Deberase ter prevista e definida unha zona de illamento/corentena ante a posibilidade de aparición de casos de COVID-19 ou de contactos estreitos.
- No caso nos que o cambio da roupa de traballo sexa realizado na explotación unha vez finalizada a xornada, introducirase nunha bolsa de plástico ata o seu lavado posterior. Procurarase lavar a roupa de traballo todos os días a unha temperatura superior a 60°C cando sexa posible.
- Restrinxiranse todas as visitas sen vinculación cos traballadores residentes de non ser estritamente necesarias.
- Os aloxamentos deberán contar cun plan de limpeza e desinfección para o que se designará unha persoa responsable.

3.3. Control da infección polo SARS-CoV-2

Esta liña estratéxica recolle o conxunto de intervencións que tratan de evitar que as persoas infectadas diseminen a enfermidade. Para elo, débese incidir tanto nas medidas de detección precoz de casos e do seu illamento, como na identificación dos seus contactos.

Neste sentido, a empresa deberá colaborar coa autoridade sanitaria no labor de vixilancia e identificación de posibles casos de COVID-19 e os seus contactos.

Con este obxectivo, a empresa deberá manter un rexistro (electrónico de ser posible) coa relación dos traballadores contratados, os seus números de teléfono de contacto, o grupo de traballo ao que pertencen e o lugar de aloxamento.



En ningún caso, a empresa permitirá que un traballador permaneza no seu posto de traballo no caso de presentar síntomas compatibles coa COVID-19, ata a valoración clínica pertinente, ou de ser contacto estreito dun caso confirmado.

Deberase garantir que calquera persoa que desenvolva síntomas sospeitosos e/ou teña un diagnóstico confirmado de COVID-19 poda illarse do resto de traballadores e conviventes de maneira efectiva.

Nos casos nos que os aloxamentos sean responsabilidade da empresa, deben preverse as condicións dos posibles illamentos, tendo en conta as seguintes recomendacións:

- A persoa afectada illarase nunha habitación pechada con boa ventilación (preferiblemente ao exterior) e con aseo propio de ser posible. De non ser posible, realizarase a limpeza e desinfección do aseo tras do seu uso.
- No interior da habitación colocarse un balde con tapa de apertura de pedal e bolsa de plástico no seu interior, para depositar os residuos.
- Para evitar contaxios, clausurarase as zonas comúns do aloxamento mentras se manteña esta situación.

4. Colaboración na xestión da incapacidade temporal





Co obxectivo de protexer a saúde pública, considéranse, con carácter excepcional, situación asimilada a accidente de traballo, exclusivamente para a prestación económica de incapacidade temporal do sistema da Seguridade Social, aqueles períodos de illamento ou contaxio das persoas traballadoras provocado polo virus SARS-CoV-2 (Artigo 5 do Real Decreto-lei 6/2020, de 10 de marzo, polo que se adoptan determinadas medidas urxentes no ámbito económico e para a protección da saúde pública).